

淮南天文訓補注

一



GT

21121.6

3C-1306

淮南天文訓補注

一

錢塘撰

中華書局

淮南天文訓補注

此據指海本影印
初編各叢書僅有
此本

序

慨亭主人嘿而湛思有子雲之好一物不知有吉茂之
恥讀淮南天文訓謂其多三代遺術今人鮮究其旨乃
證之羣書疏其大義或意有不盡則圖以顯之洵足爲
九師之功臣而補許高之未備者也嘗攷天之言文始
于宣尼贊易言一陰一陽之謂道道有變動故曰爻爻
有等故曰物物相雜故曰文則天文卽天道也經傳言
天道者皆主七政五行吉凶休咎而言子貢億則屢中
而猶謂性與天道不可得而聞則天道之微非箕子周

公孔子不足以與此此子產譏裨竈焉知天道而梓慎之見屈于叔孫昭子也然古者祝宗卜史亞于太宰馮相保章官以世氏習其業者皆傳授有本非矯誣疑衆五紀六物七衡九行子卯之忌具存昏旦之中可紀天道不諂文亦在茲是以名卿學士就而咨訪以察時變觀火流而知失閭望烏帑而識棄次八會之占驗于吳楚玉門之策習于種蠡雖小道有可觀而夫子焉不學詎如後之學者未窺六甲便衍先天不辨五行迺汨洪範握算昧正負之目出門迷鈎繩之方也哉秦火以降

典籍散亡淮南一篇略存古法慨亭爲引而伸之觸類
而長之讀之可上窺渾蓋宣夜之原旁究堪輿叢辰之
應但恐君山而外無好之者不免覆醬瓿之嘲爾竹汀
居士大听

自序

淮南鴻烈解有許慎高誘兩家注隋書經籍志並列于篇至劉昫作唐書經籍志唯載高注則許注已佚于五季之亂矣而新唐書及宋史藝文志仍並列兩家謂唐時許注猶存歐陽氏得其故籍以爲志可也宋時安得復有許注而修史志者猶采入之歟觀陳氏書錄解題有曰旣題許慎記上而序文則用高誘然則許注旣佚宋人以其零落僅存者彙入高注遂題許慎之名而其未彙入者仍名高注可知也要其冠以高誘之序則高

注爲多矣今世所傳高氏訓解已非全書而明正統十年道藏刊本首有高誘之序內則題太尉祭酒臣許慎記上一如陳氏所云是卽宋時纂入之本以校高注增多十三四其間當有許注也夫以淮南王之博辯善文辭爲武帝所尊重復得四方賓客如九師八公者廣采羣籍作爲是書固已極魁瑋奇麗之觀而東漢兩大儒各以博識多聞之學事爲之證言爲之詁亦旣疏解略盡矣道藏本雖不全而雜有二者之注在焉猶愈于訓解之止出一家而又爲庸妄子之所芟削者獨天文訓

一篇道藏本未嘗增多訓解一字而中有誘不敏也之
文其注亦遂簡略蓋此篇決出于誘之所注而誘于術
數未諳遂不能詳言其義耳然吾謂三代古術往往見
于周禮左氏春秋傳史記律歷天官書中其可以相質
證者賴有此篇儒者而弗明乎是卽經史之與旨何由
洞悉而無疑也哉竊不自揆推以算數稽諸載籍于高
氏所未及者皆詳言之亦時正其舛謬如天一元始正
月建寅日月入營室五度天一以始建卽是顓頊歷上
元則天一當爲太一而高氏無注二十四時之變反覆

比十二律故一氣比一音而注以十二月律釋之淮南
元年太一在丙子冬至甲午立春丙子歷術所無蓋時
已酉冬至脫其日名甲子自爲立春之日重言丙子本
與下文二陰一陽成氣二二陽一陰成氣三相連卽釋
太一丙子之義而截立春丙子爲句闕以注語似立春
僅去冬至四十二日此皆舛錯尤大者予之補注不爲
高氏作疏正不妨直糾其失耳書成于己亥之夏戊申
秋復改正數條遂繕爲定本焉乾隆五十三年九月九
日嘉定錢塘序

淮南天文訓補注卷上

捐海第九集

嘉定錢塘撰

天文訓上

元注文者象也天先垂文象日月五星及彗孛
皆謂以譴告一人故曰天文因以名篇

天墜未形

補曰墜籀文地

馮馮翼翼洞洞漚漚故曰太昭

元注馮翼翼洞漚無形之貌洞讀挺捫之捫漚讀以鐵

頭斫地之錫也

補曰楚辭天問馮翼何象何以識之王逸注云言天地既分陰陽運轉馮馮翼翼何以識知其形象乎

道始于虛鄴

補曰鄴古廓字說文鄴雨止雲罷貌臣鉉等曰今別作廓非是

虛鄴生字宙宙生氣氣有漢垠

元注字四方上下也宙往古來今也將成天地之貌也漢垠安重之貌也

補曰御覽卷一引作涯垠

清陽者薄靡而爲天

元注薄靡者若塵埃飛揚之貌

重濁者凝滯而爲地

補曰黃帝素問陰陽應象大論曰積陽爲天積陰爲地故清陽爲天濁陰爲地

清妙之合專易

元注專一作搏

補曰專古通搏易夫乾其靜也專陸續作搏是也史

記王翦傳專委于我徐廣曰專亦作搏今淮南注別
本云一作專者傳寫誤天言合專者楚辭乘精氣之
搏搏兮王逸云楚人名員曰搏也此其義也

重濁之凝結難

補曰結一作竭

故天先成而地後定天地之襲精爲陰陽

元注襲合也精氣也

陰陽之專精爲四時四時之散精爲萬物積陽之熱氣
生火火氣之精者爲日積陰之寒氣爲水水氣之精者

爲月日月之淫爲精者爲星辰天受日月星辰地受水
潦塵埃昔者其工與顓頊爭爲帝怒而觸不周之山

元注其工官名霸于伏羲神農之間其後子孫任智
刑以強故與顓頊黃帝之孫爭位不周山在西北也
天柱折地維絕天傾西北故日月星辰移焉

元注傾高也原道言地東南傾傾下也此先言傾西
北明其高也

地不滿東南故水潦塵埃歸焉

補曰事見列子湯問篇古蓋天之說也祖暅天文錄

云古人言天地之形者有三一曰渾天二曰蓋天三
曰宣夜蓋天之說又有三體一云天如車蓋遊乎八
極之中一云天形如笠中央高而四邊下一云天如
欂車蓋南高北下南高北下卽東南高西北下也禹
所受地說書曰崑崙東南方五千里名曰神州帝王
居之河圖括地象曰地部之位起形高大者有崑崙
山其山中應于天居最中八十一城布繞之中國東
南隅居其一分此亦蓋天之說然則中國地西北高
東南下蓋天旣以天爲東南高西北下地又西北高